

千  
山  
詩  
集

千山詩集卷一

博羅剩人可禪師著

書記今羞編

古歌謠

山謠

一尺土一寸膏膏夜流土生濤

神謠

人肉馨神眼睜

多多謠

靈蛇頭觔竹袖皇英市多多有千年龜張大口燕支稅

多多有錦牛駝銀獅吼死人汁多多有

風雅體

耿耿二章一章章十二句一章章八句

示警也

耿耿雙瞳遊于面間矚人則易矚已則難勿謂無非無非非至勿謂無知人將矚爾已非毋匿人非毋刻躬厚薄責大人之特

突如其來突如其已念生無根與物爲至紛紜不輟毋用遏絕知幻卽離空明如月

佛不在木一章章十句

靜宇師送紫榆數珠作詩謝之

佛不在木念不在珠綿綿不斷無欠無餘厥色維紫厥

質維樗渠今卽我我不是渠永言數之渠我如如

山鬼四章章四句

明月在天塔影在地北風淒淒惟吾與爾  
塔影在地明月在天汝不我處人誰汝憐  
汝惟一舌我惟一腳我嘯汝歌汝歌我躍  
天地草草山河落落霜老星殘云胡不樂

騷體

樂神辭三章

星爲馬兮雲爲轡生爲忠兮死爲厲草有子兮山有麋  
腰鐵鈴兮冠雉尾擊鼓其鏜兮回瞋作喜琉璃堂兮血

食斯地

兒孫爲田兮魂魄爲糧  
神年豐兮國爲良  
銀者白兮金者黃  
以贖命兮身面光  
一人安居兮保邊疆

黑雲壓兮金烏藏  
鼓聲死兮劍無芒  
血爲碧兮骨爲霜  
五陵墟兮萬井荒  
筆墨精兮職爲郎  
翠鈿委地魂魄芳  
日吉兮時良  
陳列兮馨香  
馬有潼兮豕有腸  
舞窈窕兮歌琳琅  
明星爛兮樂未央  
日旣醉兮雲路倘佯  
毋厄茲土兮福祚長

千山詩集卷二

博羅剩人可禪師著

樂府

枯魚過河泣

枯魚過河泣勸魚且莫泣  
勸魚且莫悲蛟龍有時斬  
何況魴與鯢

枯魚過河泣勸魚且莫泣  
勸魚且莫悲若能一滴水  
揚鬣還天池

善哉行

日月燭照民多紕繆川嶽流峙民用構鬪揖讓在前征  
誅在後世無伯夷刻薇種豆匪知何寇匪庸何富馮道  
登仙雲中稽首白鳳就烹素麟出走載沉載浮以永厥  
壽稼穡旣教生迺弗穀百草旣嘗疾迺弗救星斗在胸  
江河在口松栢丸丸斧斤祇候

南有佳人顏色靜好愛而不見鬱我懷抱昨日猶壯今  
日已老何以却之出門刈稻心洞雨晴目開天掃悠哉  
悠哉孰知大道仰掇立露俯拾瑤草薄言置之無求是  
寶樹下一宿日中一飽古之聖賢無他謬巧衆榮亦榮  
衆槁亦槁瞻彼蚩蚩怒焉如擣

短歌行

前後左右四面八方憂愁駢集我何可當欲寄天上慮  
天弗禁欲埋地下恐地將沉不如收拾置我懷抱寢之  
食之于焉終老滄海何濶蓬萊何高世無黃鶴乘我遊  
翱古之俠士塵視生死凡今之人畏首畏尾好謀弗終  
時命終窮東南失利西北多凶黃沙爲棺白雲爲槨我  
則如是千秋寥落

長歌行

我歌我歌舊民猶可新民柰何

薤露歌



薤上露畏白日日出露乾無遺迹古今杳杳無消息寶  
馬空嘶堊樹直

蒿里曲

蒿里誰家地日夕悲風起命盡五更頭不到五更尾狐  
狸招手人不知脚下黃泉尺有咫

秋思

鴻雁逐飛雲青天亦有行兄弟本四人仲季歟云叵伯  
竄東海隅叔留南海旁相隔萬餘里東南永相望憶昔  
在長安膝下共兩雙朝去候門扉朝回牽衣裳憶昔在  
南國齊揖事先王教訓日以嚴道義日以康憶昔在家

園氣力各自強讀書窮壺輿落筆競沅湘神異古人遇  
舉世無文章當春二三月風吹百草長登堂獻壽酒散  
步陟崇岡夏日聽黃鸝陰陰亭館涼折荷綠玉池剝荔  
黃金床桐葉下金井四圍橋柚黃薄暮向空塔聯袂延  
月光忽見梅花發大開樓上窓色映枝枝玉詩成字字  
香好景必同賞佳釀必同嘗夜寒必同被得句必同商  
先子忽見背血淚盡汪洋三載草土中不離阿母傍伯  
也忽瞿然團圓非久長拜母別諸弟雜髮棲大匡仲弟  
登賢書雲路步前芳叔弟薄青衿欣然慕老龐阿季獨  
俶儻走馬少年場抱志雖各殊骨肉不相忘一朝日月

墜大地共倉皇紫荊長枝折飄零天一方寄書阻兵革  
得罪飽冰霜遠磧聽笳吹回頭盼故鄉前月片紙來摧  
胸裂肝腸閭井十無一舉家慘罹殃叔弟尚伏枕一命  
在微茫母死恐未葬弟死誰蓋藏登山苦無梯涉河苦  
無梁山木何脩脩河水何湯湯安得高飛翼駕我以翱  
翔狂雨日下來白晝黑淋浪

秋思曲

山峩峩兮水盤盤念佳期兮秋月圓攬衣視夜兮風雨  
迎門彼美人兮梅一邨

靜夜吟

秋夜如漆我心憂醒亦憂寐亦憂兼之蟋蟀苦鳴不休  
攬衣忽坐起還臥泪橫流大風吹樹何颼颼床頭書鬼  
聲啾啾家鄉已蕩盡胡爲身獨留

我有一點心暗風吹已碎一半福州山一半潯江水

少年行

紅日射高樓歌聲不肯休借問北邙山幾人曾白頭

塞下曲

日落雁聲急蕭條人獨行偶看原上草偏動黍離情

臨高臺

臨高臺望行塵多少驅車向西去曾無一個是新入

臨高臺望東海海上潮回自有時流民東來無返期願  
平高臺塞東海毋使流民心骨碎

相逢行

相逢路多岐君東我自西莫問名和姓回頭知是誰  
相逢大路側君南我自北袖裏無黃金終是不相識  
相逢大路中君西我自東不知爲何事但見馬匆匆  
相逢兩復三君北我自南明知不是伴半揖畧交談

空城雀

空城雀腹中饑雀雖饑無是非莫向上林枝上棲

君馬黃

君馬黃四足，忙揮鞭。意氣何揚揚，我獨無馬步。道旁我步躑躅，君馬狂下有不測之大壑。上有崎嶇百折之崇岡，萬一失足，人馬皆亾。願君下馬爲君指林間有路平且康。

長相思

長相思來何遲，荆山鼎就紫清歸。六宮粉黛化作泥，王母高居在瑤池。無數仙人進玉飴，千秋萬歲以爲期。何不駕六龍中天飛，青鳥銜書到海涯。杲杲出日浮雲蔽之，長相思不可知。

長相思暗淚披，蟲吟草根如知之。夜深佛火光希微，鐘

鼓不鳴心肝摧白雲一片何處栖故園紫荊餘枯枝長  
相思見何時

長相思在上古神農虞夏皆黃土手把黃土心欲訴黃  
土烏知予心苦向空一擲散如霧天無門兮地無路龍  
爲魚兮鼠爲虎願還蒼生置三五四海欣欣歌且舞

關山月

月向巫閭山上出不照人間照死骨死骨千年更不還  
魂隨山月度重關關山疊疊歸魂苦蒼茫不記來時路  
閨中少婦獨夜眠心心囑夢去寒邊夢去魂歸不得遇  
明月如霜草蟲語

關山月何慘悽城上吹笛烏復啼城下秋草白萋萋安  
得長風吹此月直向石洞青松枝關山月無盡時

來日大難

來日大難風雨在門今日有客且共盤桓精衛銜木東  
海必填匹夫立志金石匪堅葛洪熟識貽我大丹不願  
長久顧世多艱白雪充腹敝絮遮寒咄咄罪夫在天地  
間冥冥何用栖栖亦憊沮溺弗爲何況孔孟朝歌亦入  
盜泉亦飲下士笑之上士同哂

有所思

有所思乃在村頭三五樹樹上啁啾翠羽鳴樹下美人



向空語此時山月定得聞似解不解無倫緒一捻愁心  
到夜闌憑誰寄與長邊戍山月似歸天上去

樹中草

微賤一莖草寄生枯木中客土本無多安敢望丰茸孤  
根藉纖露暫此朝夕榮不擇棟樑材祇貴空能容

少年子

白面少年子無金空有心半夜許人半夜死肯待東方  
天日臨古來獨愛荆軻義易水一去無還志中王固佳  
中柱亦喜舞陽死灰不足言勾踐嗟嘆亦非知若將成  
敗論沒却一片意

久別離

久別離已見塞鴻三度四度向南飛前歲寄書今歲至  
開槭一片血淋漓讀不得盡卷而懷之夜半作書報君  
知前有平安兩字後有相思一詞後頭是實前頭非殷  
勤拜祝淚紛披書來已辛苦書去見何時

放歌行

斫却孤桐鳳或來止堙却潁川由或來洗古無天地高  
下何論古無江河清濁何分我有素琴無絃一曲秋風  
乍來聲出林木亦盜亦廉非夷非惠知我則希我則何  
貴泰山一拳滄溟一勺天日明明亦胡能燭

隴頭歌

隴頭流水或西或東哀此飛蓬瞻望舊叢舊叢久空憂  
心忡忡

隴頭流水聲慄以悽落葉從之永辭故枝

妾薄命

十三嫁先夫十四先夫死十五嫁後夫十六後夫死兩  
度踏君門依然一童穉鳳釵兩股齊羅衫色仍紫哭新  
兼哭舊那復再生理吁嗟十七十八嫁何遲惟恨當年  
錯歡喜

雀飛多

雀飛多觸網羅可奈何回頭語飛鳥汝母翼折待汝哺  
饑不及朝朝不及暮風中之燭枝上露莫取盈倉填汝  
嗟

望夫石

望夫石江邊守江易枯石不朽生公說法也難聽直待  
夫來始回首

有所思

有所思所思亦何益我置君心于我心君置我心于道  
側君心似我胡可得北斗在南南斗北泰山如砥平黃  
河如箭直若得君心有轉移與君重復整相思

野田黃雀行

自識形軀小竊愧羽毛黃野田隨飲啄短叢足翱翔且  
不羨鴻鵠何況鳳與凰笑彼斥鷃儔徒欲上高岡高岡  
豈不樂顧影亦慚惶

行路難

行路難不在山間與水間水有漩復山有崎嶇城門大  
道蕩蕩愁子見人必恭敬避人必歛獻歛獻亦何爲恭  
敬亦須與人情不一多凶少吉

千山詩集卷三

博羅剩人可禪師著

書記今羞編

五言古一

秋思新淚

新淚拭不乾古淚已及趾二儀清濁分傷心從此起  
倮蟲日洶洶聖人鑿其知飲食藏兵戈結繩開禍始黃帝  
學道流剪滅神農裔蚩尤縱無良榆罔惡未極大哉夏  
禹功澤流應萬禩當桀放南巢扈從何名字直待採薇  
人兄弟標忠義忠義旣以明天下爭一死苟息殉遺孤

明知是無益崩贖命驅車其僕乃結轡畫邑布衣流懸  
樹續齊祀豫讓行何苦漆身乞于市所以爲此者將以  
愧後世漢祚當衰微英雄紛舉事臧洪據地時陳容忽  
揚袂當日同座人胡爲空太息卓哉巴郡守斷頭心固  
貳晉惠昔蒙塵百官皆散潰獨有稽侍中衣血足捍衛  
周顛急呼天下壺長臥地此外亦寥寥閒居談名理唐  
有藩鎮難諸公何慷慨張興解其屍張巡抉其齒杲卿  
更憤激鉤舌詈不已阿弟死希烈自草表與誌屈強德  
宗朝劉迺段秀實奪笏直唾面投床遂不食乃有孫節  
度受錮無紉志宋代光前古編簡難盡紀載觀靖康初

十人關和議第一歐陽珣慟哭深州外微言閤室焚仗  
劍語將士令歲堅執膝終不拜犬兔若水槌破唇彥先  
刃左臂痛惜岳家軍十年一朝棄淮寧向子韶建康楊  
邦又不作他邦臣寧作趙氏鬼北兵括地來屈指數李  
芾取酒飲家人徧刃無遺類幕屬及潭民舉族多自縊  
林滿井無虛激厲乃如此亦有趙卯發亦有江萬里亦  
有宣撫陳亦有少保李節義或一雙積尸或如壘或赴  
沼自明或指腹自誓廣王終崖門陸張隨入海於赫文  
文山義盡仁乃至平日讀詩書庶幾可無愧乾坤掃蕩  
來聖神廣栽植烈烈復轟轟又非宋代比書以白銀管



藏以黃金櫃地上反奄奄地下多生氣我欲從頭哭  
淚盡東海水白日且吞聲歌咏聊爾爾

采菌二首

木生在高原豈意爛作泥茂草蒙其頭牛羊踐踏之自  
顧不敢怨世事安可知每歲五六月日晒雨復滋曄曄  
長新菌五色轉參差黃者金芙蓉青者碧玉芝天地有  
正氣積鬱不得施觸物吐光艷腐朽化神奇采采必盈  
筐躊躇發深思物理固難測可以療我飢

三五趁曉晴隨雲入澗壑志與枯槁遇榮茂非我樂顧  
視深草間異種紛相錯恐是蛇虺居根性乃獨惡擯棄

稍不嚴美口成毒藥氣化豈有殊君子慎所托

古意二首

作花莫作菊東籬成荒叢作木莫作松孤高孰與同何  
如蕭與艾雨露亦丰茸節序暗易換只恐是秋風  
作鳥莫作鳳舉世無梧桐作獸莫作麟唐虞不再逢何  
如鷄與鶩飲啄亦從容鼎俎久相候安能長自雄

經言

朝出見歌舞暮歸見黃土此事未足奇所奇在何處朝  
出見歌舞暮歸見歌舞

積中三老咏

龍鱗積深泥鬱吟豈其志江海起胡髯一噴天地沸弟  
死身獨留此中有深意不作文文山徒然歌正氣  
讀書抱區區所爭吾是人博浪偶不中甘心東海塵萬  
死存一卷遇物吐其真手栽桃李花將欲變荆榛  
割世一何毒取義一何癡嬉笑歌哭間往往見其微此  
事信莫委一逞遂不疑目視今古人安顧聖賢嗤

落葉

空庭蕭秋氣一葉最先飛衆葉皆不顧孤客暫相依曾  
受日光照融和露復滋鳴禽爭上下繁陰覆堦墀誰能  
當此際返念樹上時御苑芳菲盡何況托根微飄零固

其分汗泥安敢辭寄語樹上葉千年長在枝

泪

我有兩行泪十年不得乾灑天天戶閉灑地地骨寒不  
如灑東海隨潮到虎門

示學人三十首

古人有良規不可去斯須隱微密自燭非爲外貌拘束  
已若不足東人貴有餘苟非大聖心惡能從勿踰豈不  
開喆言水清則無魚

根實枝乃茂源深流自長方寸苟自正立世大堂堂人  
譽我胡親人毀我胡傷浮雲一千里難掩赫日光

大象踏兔徑達人畧小節大本但勿渝安能事瑣屑  
經然小人閉口休辨別

大道如平砥人自向高山不知千萬程近在足趾間  
出戶復入戶何用苦煩難

粗糲亦克腹破衲亦遮寒身口本無多知足又何難  
紛紜世上人至死不得閒

古人身上肉今人足下塵塵爲人所賤昔時曾自珍  
幻軀何足論所貴得其真

龍亦不在天龍亦不在淵飛潛信有時神物無一專  
莫爲葉公好頭角空自懸

我從物則奴物從我則主物我本無分茫茫失所據反照識獨尊混然在一處雖與物去來不共物來去

人生各有病深淺惟自知百草不能至扁鵲空攢眉佛祖入膏肓此病最難醫

言亦不可甚行亦不可極行極無餘地言甚無餘旨大人處世間常留不盡意

處安且毋喜處危且無患得失無定形禍福掌一反三復塞翁言此心常坦坦

逆流易自持順流多失措人世陷其身不以危險故君子慎平康一步一回顧

入世毋強同強同多厚顏入世無強異強異難獨全平生默自抱不卽不離間

少年易使氣俗物必遭吐忽遇其中人胸肝急披露老大足和平于世或無忤涇渭難自渾時復露其故

花不與蝶期花發蝶自癡世不與人期而人自干之遇物苟無心紛然無是非

老人莫自傷白髮抵黃金請看臺下土盡是少年心曉起若有待晚來何處尋

爲惡祇自殘爲善亦有數善惡皆幻生勞勞成今古若識非幻者無欣亦無惡

有作必有受須知無受者昔日與今時互換形皆假稽  
首獅子尊癡人徒嗟呀

山翠亦有色溪流亦是聲居心苟不靜山水是非生請  
看金馬門誰辨濁與清

形骸暫相托保護爾何爲一息苟不來撇之去如遺君  
看搗藥人誰能白晝飛

日用亦有限世人重光輝心計苦不足儵忽西日頽勞  
我一生力營他眼前爲

江海本無波颺風不停吹我心與境接日夜紛交馳若  
了心境幻彼此不相知



行止鎮相隨不識何面口自古稱上賢只此無先後可  
憐照鏡人迷頭日狂走

見人學恭敬坦率招時嫉縛節與閒言塗飾度朝日安  
得古初民相與寶真實

結交若如初何必重雷陳學道若如初釋尊滿界塵大  
法本無多久長難得人

丈夫貴立志萬古只斯須舉步稍旁顧寸地阻前趨壯  
哉海岸人蛟龍還其珠

塵生在毫芒人鬼莫能窺勿謂此纖纖鬱勃閉陽輝不  
見滄海流其初涓滴微

巨魚爭洪波細鱗集蹄涔巨細雖各別共此朝暮心我  
生復何營空林張素琴

片雲起前山飛來復飛去日夕衆鳥栖微風息庭樹我  
心與之然淡寂冥羣慮

子規啼不息中情諒無極鮮血流樹枝入地深一尺去  
去復何云月來山寂寂

與藏主夜談三首

道窮易感恩况有一片意談深忘夜寒皎月從中起心  
期正未涯人世薄于紙

高林不擇鳥大海不擇流流多海益深鳥多林益稠達

人貴胸襟毋爲細瑣求

善乃惡之對福兮禍所依所以學道人恬淡貴自持只  
此一瓢水世世以爲期

採菊

道傍見殘菊幽幽生意微落英沉無多安能療我飢折  
來置空甌共此秋風吹

孤吟

空洞接混濛其中有日月古喆親至前萬象森以列草  
木共話言死骨亦得活明和春山暉巖凝灑冰雪石池  
起層波浩浩皆鮮血魚龍各生愁方寸恣出沒點畫入

重玄十指電光掣星斗盡下來八方不盈撮倏忽天地  
冥鬼神棲其穴殘魄靜獨抱性光自相悅此際吾不知  
雖知不能說

寒還將行過宿

憶初與子遇我命如懸絲子時顧我泣豈意共邊陲三  
歲相形影孤雁常雙栖是夜足風雨來將與我辭人情  
欲分手先問後晤期子今從此去心知見無時死別在  
一割生別長苦思子生必思我我死子安知同是籠中  
翼一伏一出飛人鬼不容髮安能復遲遲努力事前路  
勿爲兒女悲孤燈久已滅起視夜何其開戶天地黑雞

聲慘以悽

聞耀寰舍卒就道

邊塞雖云苦久客亦有情況復飲咏多相與若弟兄言  
別已兩月依依不能行昨日顧荒寺猶云候層冰今晨  
寄聲來急促事長征牛車滿殘帙牽兒苦伶仃豈不惜  
離別嚴驅無暫停寸心未一言遙遙望前塵

中秋夜獨坐

明月在簷楹披衣我獨行如何一步地偏生萬里情去  
去我欲眠明月不須明

中秋同集雪齋

塞外亦團圓道古情乃至宛然一家人刻却流離意薄  
暮各言歸一一邊愁起

採蜜

深山有君臣大義不敢忘枯木以爲國百花以爲糧何  
以服其衆無毒者爲王王居必有臺衆遊必有方朝出  
暮乃歸一心無別腸自謂可無患世事固難量烈炬何  
方來舉國紛倉皇興亾掌一反儻忽無遺良物類雖甚  
微性命關上蒼區區口腹欲無乃太慘傷爾蜂亦何愚  
蓄積名禍殃

採藥

靈根產茲土遼邈絕人際一本三四極圍葉如張蓋結  
實挺中央顆顆墜紅米高出衆草上百步望光采羣生  
必有長約畧具形體無莖曰睡參堅白味數倍天子憐  
病人歲中必命採枵腹入深林陰翳日月晦舊人去易  
歸新人迷道里抱參不敢嚼往往飽虎兕神農開禍先  
遺累終不已

賞花

人愛花開好我畏花開早開早落亦先旭日無常照世  
無魏與姚各自矜芳號富貴豈久長露晞色隨槁我每  
見花哭人爭見花笑笑哭亦何關衰榮本天造百物信

有時黃紫遞光耀爲語賞花人徒然亂懷抱

狗嬾子

中原所不識神農所不載味酸性微寒嘴尖腹漸大叢  
生綴短枝渾疑人血洒碎鴉蜜羅澄粉如割成塊陳列  
俎豆間明明格上帝此物亦有時黍稷皆下拜

贈兩公子

公子年方少舉止皆老成阿兄益威重阿弟神復清總  
角遭亂離高岡無鳳鳴從父竄東海赤脚走層冰雖乏  
金與粟卷帙猶滿簾斗室足吟唔晨夕披不停古人有  
心血今人有眼睛讀書只讀字大海無涯津性道本飲



食瓦礫通神明苟自得綱紐千載任縱橫天地我註脚  
何況是六經切磋卽手足菽水見模型榻管爾家事文  
章出至情勗哉兩公子艱虞力彌增今古無別路非關  
世上名

月

人家小兒女舉頭見月笑山中老洞猿見月一長叫物  
感固自殊明月同一照

與希焦二道者夜談漫紀

崔嵬丹鳳闕旁聳大羅宮中有兩道士老少顏皆童少  
者王子晉老者是葛洪頭戴五岳冠霞裾珮玲瓏相將

步高壇琅敷響碧空曲終天欲曙紫霧雜旛幢有時草  
玄文翩若戲海鴻有時看寶劍光芒斗牛冲冰雪貯心  
腹秋水湛方瞳架上九丹經雲錦百千重問以世間典  
亦有舊詩筒疑爾食字化又疑白鶴雙憶我初來時蕭  
索若飄蓬李君下拜揖遙指崑崙峰千尺水晶樓白雲  
有路通竹杖叩丹扃一見氣春容不識人間禮欣此邂  
逅逢飲我鴨綠江食我西山松贈我白馬牙衣我千針  
縫乞者固無厭施者意方隆共坐論南華塵柄各橫縱  
出門薄雲車金勒玉面驄瞬息三千里往來若遊龍匪  
特仙骨輕兼之俠氣雄最愛秦三良二年煮石供忽聞

胥靡饑中心已忡忡欲將洛多土盡置碧紗籠吁嗟下  
界苦藥裹安足充願借白羽扇熄此天地烽願借太乙  
爐楮樵燄方紅全收古今愁付此鼎中鎔鍊成五色石  
以補西北穹再借一指頭著我七尺筇一點醫巫閭化  
作萬選銅白拂從中分相峙若秦嵩一飽山中狼一以  
濟保虫然後拾其餘置之布袋中十日買一兩五日買  
一風更買雙鳳凰朝夕鳴梧桐一鳴黃河清再鳴菽麥  
豐二仙笑余言茲願何匆匆一治復一亂天運無終窮  
烽火奪炊烟甲士詎爲農閒愁亘古今女媧嘆無功狼  
貪不可厭林林禍方叢古佛雖大悲難挽水火風買風

復買雨能令宙合同何似買杲日高掛扶桑東光照北  
邛山永塞高下春鳳凰亦有死黃鵠一飛狎騎之遊九  
州長笑入崆峒子復笑二仙斯志亦未崇不如買鼠鬚  
束筆擬長杠高爰展素箋浩浩寫心胸心胸亦何有浮  
雲日夜撞傾血三百斛奔流瀉石磤化作大海濤一蕩  
天地蒙冥漠前致辭恍惚覩儀容知是前代人燐光如  
白虹三讀不二歌聲聲噎寒鐘二仙寂不言怪涕亦無  
從暗風吹窓櫺殘月若朦朧鷄聲催天衢妄談猶未終  
吁嗟此一時萬年想高蹤一個寒冰佛長伴兩木公

贈王三

僕走馬復死手中缺銅錢  
茆屋臨道傍床壁相新鮮  
長齋禮繡佛但祝慈母年  
飯僧本性情匪獨于余偏  
瓶粟或不繼大笑斷炊烟  
已饑猶可耐人饑甚憂煎  
眼見陳氏子欲嚙無寸氈  
倉皇走道途願爲覓數椽  
數椽亦易易所貴主人賢  
下榻橫藥室授經向市廛  
片瓦苟蓋頭飽食卽神  
仙子亦爲陳子朝夕心  
乾乾好事見他人題詩  
後世傳

雨夜留戴子共榻

爾從北山來日暮扣荒寺  
開門兩面愁不語淚及趾  
半月絕相聞豈意俱復在  
我心猶恍惚是魂或是爾  
衣破

露用臂所苦不得死相與藉草團夜深僵無寐大雨黑  
颼颼點滴到肝髓忽憶田中農一聽能無喜雨喜復雨  
愁天心安有二

雨中聽打鐵子唱吳歌

孤寺沙四圍曲聲從中起初發雨霏微須臾忽滂沛飄  
風遶屋梁過雲雲欲墜鸞吹與鶯啼化作清商意神女  
朝暮愁鮫人深下淚半夜彈箜篌河流終瀾瀾此地多  
野干鎮日鳴不已願借清絕音一爲洗煩耳乍聽疑廣  
陵又疑秦淮沚試問歌者誰云是打鐵子少小學閭門  
隨颼度遼海無食澀歌喉揮錘涕如雨再請歌一曲未

歌先掩袂宛轉更悲涼增我流離思

哭吳岸先

我生亦偶然汝死何草草檻車憶初來面凹露雙肘既  
被冰雪侵况復遭羣侮有口難告人束身守空窶汝書  
猶在眼汝顏不復覩吁嗟骨似柴安能厭豹虎四海盡  
秦坑詩書同一炬二月金鷄飛恨汝不得偶揮泪約同  
人携灰反舊土茲願又已乖總入山鬼簿後先理亦齊  
不如早還故地上莫能容地下可相許蒼蒼久不聞休  
向帝庭語吁嗟復吁嗟萬里餘妻女春閨夢或逢肯道  
寒邊苦

摘藤菜

清曉鳴轆轤携杖入芳園中有滿架藤稠疊鋪綠雲不  
雨色常潤無風葉自翻圓實間深紫燦爛吐奇文土人  
不肯顧瓜茄乃盛盤異種生嶺南移栽東海澹地瘠饒  
霜雪弱質焉久存一摘淚盈把再摘心悲酸摘密休摘  
疎聊以刪蕪繁輕指莫動搖恐或傷其根雖知冷必死  
且護眼前安昔日蘇長公題詩謫古循諸品獨見推謂  
可方吳萼予今竄遠積舊國變荒榛親朋無一在見爾  
如故人柔滑淡相得破鑄煮泉新一筐貽北里甘苦味  
共分爾藤亦不幸處處逢逐臣



戴子賣衣買粟

昔日豪華子揮金如糞泥舉箸常干命山海羅珍奇賓  
客歸必醉僮僕厭甘肥一朝竄絕域無食但解衣解衣  
衣復賤粒米如玉飴身口擇所急未寒先療饑已饑尚  
可忍所苦妻與兒老僧有破衲朝夕幸得披仰面看皇  
天霜雪不能飛

佳人

佳人年十八生長自皇都結髮嫁遠人謂是終身夫鷄  
狗亦相將任逐東西徂西行過洞庭東竄寓穹廬豈料  
一朝餓顛盼及妾軀夫餓妾亦死妾賣夫得甦掩袂請

速行東鄰有積儲紅顏賤如土斗粟貴如珠但得前夫  
飽焉顧後夫痛夫痛齒復落猛虎踞庭除十日不相容  
苦勒解羅襦解襦兼解袒赤身哭向隅不願新人妾寧  
願舊人奴舊人與新人倉皇走道途少小學刺繡光綾  
三尺餘上有雙蝴蝶下有比目魚只今拭枯眼一片血  
模糊父母若早知不如棄溝渠

崔氏筵食乾荔枝

嶺南四五月丹實喜垂垂貧者亦得飽烏雀各癡肥一  
別逾八載寤寐長相思誰謂我此生復有見爾期爾顏  
寧似舊臭味已全非入手倍見惜未嚼心傷悲想爾當

繁茂豈意落邊陲見我良獨愧席上共珍奇我實諒爾  
心人世貴相知

雪齋燒沉水香

草木抱真性植根良獨異當其枯槁時衆目安能識藉  
此星星火可以格上帝鼻端絕往來混然在一氣氤氳  
托冥會非關有夙契欲索已寂如肺腑無不至彼此本  
同源靜中得其理何親復何疎當入枯魚肆

雪中同我存圍棋

世事盡如此黑白安足爭雪片大如掌棲身復打枰十  
指化作水猶聞落子聲

雪晴見月

月以雪爲骨雪以月爲神孤僧立其際相與共一身僧  
老身易稿雪薄骨成塵獨留一片月千年照海濱

一葉吟

衆葉落地死一葉枝上留雖自保朝夕其柰無朋儔天  
日遠不照霜雪臨其頭大枝且摧折爾葉能無憂

殘菊

菊開人盡賞菊殘人盡棄我昔賞無心今看有深意嚴  
霜摧其根寒風吹不已豈獨戀深秋不向籬間死前芳  
恨莫留後芳猶未至耐此朝暮心徘徊冰雪裏

二高過訪

小阮如鋒銳大阮淡如水如鋒令人歌如水令人醉共  
割一片氊南北餘二里不約過僧廬久置人間禮趺坐  
草團中相視忘我爾問禪禪不知問字禍之始不見雙  
足間斑斑餘十趾正當語笑歡忽然發長愾豈爲逼饑  
寒各有胸中事

瓶中芍藥花

瞻茲瓶中花疑我夢中身我身半泥土花開如有神憶  
昔少小遇燦爛京華春富貴久凋落金谷盡荒榛胡爲  
留絕域氣色倍鮮新紅白各異致相對成芳鄰白者性

頗耐紅者先委塵因以悟物理淡薄保其真

讀杜詩

所遇不如公安能讀公詩所遇既如公安用讀公詩古  
人非今人今時甚古時一讀一哽絕雙眼血橫披公詩  
化作血子血化作詩不知詩與血萬古濕淋漓

千山詩集卷四

博羅剩人可禪師著

書記今羞編

五言古二

春雨

春日無不可倏忽易晴陰  
春晴送遠日春陰生靜深  
垂簾據半榻羣動不得侵  
殘卷落枕頭默默橫素琴  
簷雷發奇響欲洗無塵襟  
風鈴濕不鳴禽鳥息高林  
耳目乃森肅今古同幽尋  
孤吟從中來古木助清音  
雨止籟俱寂悠然獲我心  
我心豈由物遇物屢悲欣  
起覓已無端

微雲散遙岑

古硯

余家端溪旁持斧斲溪骨歲深積成林真氣資蓬勃一  
從板蕩來散作磨刀石墨池鼓風波焚之恨無及奇觀  
乃于斯轉復生歎息古繡若苔斑瑩然馬肝色沿缺中  
已凹定是千年物黑松發黯光滑澤水不竭想其在空  
巖無心求賞識良工苦經營因以珍几席不知前代人  
研盡幾斗血神物固不常自然遭磨折笑彼卞氏璞欲  
遇徒三刖如何抱堅貞靜默守寒磧我見豈偶然爲之  
重拂拭再拜置諸懷永以伴幽寂



從千山携龍牙回約諸子同噉

不是山中人，不識山中味。采采須及時，盈筐登山翠。  
以山中日濯，以山中水恬，淡本性成，微苦亦有致。楮鷄  
非其倫，弟薇友石耳，携之入城郭，猶帶山嵐氣。一嚼清  
齒牙，再嚼沁心髓。願言嚼雪人，共領山中意。

偶懷

手把山中雪，欲寄城中人。城中亦有雪山雪，淨無塵。解  
白却易點，願言慎厥因。

咏古二首

富春不避世，渭水不匡時。事會乃適然，隱見無預期。鷹

揚若有意何異熊與羆羊裘若無心客星光亦微營丘  
與釣臺千載高鬼鬼

采芝入深谷養此眉與鬚一朝事適逢敢自愛幽隅以  
身爲羽翼豈曰爲帝儲安危在一割漢道爭須臾卓哉  
四老人山水本空虛

清曉

清曉候門立癯然骨空留舉步衣塵飄知是儒者流向  
我一長揖未言知有求曰來自暮春挾卷逐朋儔只言  
秋有花誰知雪空稠許織旣非素顏瓢亦足羞男兒  
四方身口不自謀日饑猶可支夜寒風颯颯擊石甃

枝卽此是衾裯吾道乃終窮悔不事荒疇薙髮入空門  
未審能見收我開心慙裂啞咽語不休止止勿復道分  
鉢潤枯喉斯文天未喪詩書安可譬

卽事有寄二首

貴賤本殊倫禍福無常理大寶不發光常恐逼神忌寧  
作井中泥毋爲江上水水清起波瀾泥濁甘同棄寧爲  
井中蛙毋作枝間翠枝高弋者慕井深終有底達人置  
其身不以衆趨地卑汙勝高明高明吾深恥

多難賤骨肉豺虎同居止神馭若無方爪牙奮其利盈  
盈天地間出入將焉避防維非不同恥辱皆有以所貴

我無心無心以終始

臘月九日夜

臘月九日夜明星猶歷歷須臾布稠雲青天無間隙掩  
戶擁敞裘孤心守岑寂狂飈恣憑凌千峯交劒戟魑魅  
集堦庭豺虎成羽翼乾坤互叫號百靈齊辟易鵲巢委  
塵泥喬木無一直勢壓棟欲摧誰復支半壁東南三尺  
窓恍惚萬矢射傾如裂繪聲枕上生霹靂河圻長白頽  
縱橫那可敵寒軀幾欲死乃見袞袞力終古竟如斯帝  
心殊未測因思行道人咫尺將焉適安得大布帷萬姓  
共栖息

對菊

河東一老翁贈我菊一枝一枝四五花衆葉亦紛披沃  
以石泉水培以高岡泥當此草木枯孤生無乃奇春露  
既無分秋霜安可辭負性寧或殊存心良獨希城中多  
霧塵對酒亦非宜所以避名園并不羨東籬獨愛山中  
人相向共茆茨本無堪俗賞非自寶幽姿日夕幸無營  
寂然淡共持

採石耳

唐帽萬仞崖下臨不見底乾葉掛危枝苔蘚爛蒼紫黃  
鶻自去來玄猿或遊戲一僧年半百吟嘯倏然至左手

提竹筐右手懸雙履陟險若康途牽藤摘石耳石耳連  
石骨淨潔無纖滓不知幾千年噴岫積幽氣或言冰雪  
生或言霧烟寄瓦礫就泉烹舒卷黑雲膩荔枝非其倫  
芥葉差可比始信深山中自然有真味

筆管花

宛如青玉管高卓白雲間神農有遺方食此可駐顏駐  
顏亦何益聊以備朝飧或者輕我身飄然返故山

散淡花

青莖發紅葩蕭疎間山翠厥根衆瓣攢大都蕊白類性  
既和且平微苦亦有致其味信足嘉其名亦足紀安得

散淡人相與長甘此

豆葉

匡山有豆葉因以名其坪豈知大漠間豆葉亂縱橫物  
遇各有時感茲雙涕零中原易見知芳潔薦神明何爲  
棄道途隱沒衆草并幸未馨羣類庶可遂其生

苦瓜

苦瓜生五嶺賴以解炎毒塞外亦繁生不能悅羣目我  
來無故人見之等骨肉畏苦乃常情甘茲信子獨

網罟菜

菌生何多奇千百類莫窮大抵托枯株登雲高重重茲

性迴自殊卑栖污泥中汙泥雜黃沙河岸柳條叢土人  
不知名日與網罟同其處迺獨下其品乃獨崇老氏不  
敢先允爲百代宗

冬日偶成十首

一人有二心何況二人同面交且莫論鮑管亦匆匆落  
日變朝槿微風喪秋桐蘭室爲枯肆芳穢味俱濃安得  
一心人相與耐寒冬

古人各有爲何況今之人黃金葬神仙白紙裹儒紳最  
苦獅子皮束縛老狐身爲龜苦不靈爲麟苦不仁安得  
無爲者相與率天真



人獸不容髮何況信汝意汝意不可信深井洪濤起出  
門見夜叉入門守鄉里誰能暮行渴不飲渠中水是名  
毋幻村英豪就中死安得無苦人共談清淨理

咫尺有千嶂何況見面希相去日以遠相期日以非堅  
白雖自矢磨涅亦非宜苟非金與石胡能終勿移厥初  
豈不光厥後難可知安得守貞人萬里相因依

僮僕各有口何況是閭里馨聞止門屏惡聲遠亦至李  
下與瓜田嫌疑須遙避莫言小節拘踰閑從此始安得  
君子儔相與慎行履

防微猶或疎何況弛其大星星欲燎原涓涓欲成海內

心起茫忽相續必以害咄哉野干流口口矜無碍神明  
雖至聳顧影恬莫怪安得持身者終始期勿敗

簞豆亦有爭何況是阿堵古聖喻毒蛇道旁不肯顧往  
往骨肉殘伊維此之故苟免寒與饑毋去人所惡外示  
夷之清中懷跖之汗遂使烟霞間翻作井市路安得樂  
道人相與寶淡素

知美斯已惡何況樂羣稱至道本平實神鬼忌高明所  
以先哲言爲善無近名如何資葦菴欲播蕙芷馨志士  
寶心骨浮俗吠虛聲安得遯世儔相與效鴻冥

大聖有定業何況茲凡濁多福難自求禍患依前躅勞

勞亦何爲兒女同笑哭顏天跡乃壽順逆多反覆安得  
達命人任運保幽獨

我心殊靡定何況他肺腸已物無二體君子貴自強曾  
聞二十劫諸道共相將胡爲夏與冬一歲判炎涼聖賢  
在一決好惡寧有常未達法源底懷憂欲成狂安得曼  
殊劍破此夢幻場

劉老翁

河東止一家夫婦俱老瘦膝下無兒孫籬外無鷄狗我  
來度木橋疾走出門候麥飯雜菜羹呼佛不離口

黑雪

關東有黑雪今乃覩其形青天無纖雲皎日爭光明土人指往事曰此非佳徵清白本其性遠近無殊稱厥色稍不如遂加以黑名雪爾宜自慎最險是人情

阿字行後作七首

少小不相識緣師起相思毅然請獨行隨身破衲衣崎嶇七千里出塞致書詞見書兼見汝見汝如見師我來八九年是日一展眉

初至文殊寺日暮雪綏綏凍手解皮囊短札外無餘主人敬愛客燒泉夜圍爐遂罄鄉國語一一與淚俱或爾強歡笑或自簡殘書談道欲抗昔言詩每起予得句必

朗咏時驚山鬼呼寒臘亦易過從子策蹇驢遍視新流  
人兼履舊邊隅一聞西嶽言躍躍動衣裾爰登千山頂  
翹望醫巫閭分題寫怪石摘食盡野蔬水解梨花落興  
盡春已徂扶杖過金墦寺小足安居况復主人賢善謔  
禮無拘經夏復經秋涼風滿庭除忽憶匡山期掩卷賦  
歸與嚴命難再淹令我立躊躇

言別多哽咽况我大漠中我身如斷梗爾身亦飄蓬相  
聚雖一歲恍惚數夕同爾留已多恨爾去更何窮秋風  
振高林落葉分西東雁飛不成隊菊開不成叢作書報  
汝師兼上老人峯平安復平安把筆心正忡

收拾舊布囊新詩疊重重臨行不敢泣各自慘心容河  
凍不能寐言寄海舶中仰看鶴路直俯視鯨波重千里  
在呼吸一杯浮虛空日星掛看睫灑氣蕩心宵禁聲莫  
高吟恐或驚鼉龍

且喜免霜雪其如多風波知爾能自信風波柰爾何因  
再整麻履還向薊門過京塵猶漠漠京闕尚峩峩此地  
惟貴遊孤鉢莫蹉跎

乞食過東魯歛策入白門白門我久遊故迹應尚存板  
橋通秦淮高樓近長干雖無鍾山松雨花可盤桓舊識  
如相問休言雪窖寒

稽首栖賢老百拜華首臺少病復少惱步履永康哉月  
缺必復圓鶴去必復回時序有循環雪消春水來願言  
各加飧毋重念不才

屍林行後作

憶昔度庾嶺四人惟汝存况我被逐後相訪獨殷殷鄉  
邑久已破眼中無別親尋屍亦多事嚙雪非前因萬里  
風波際一瓢支遠頻華首重相問然云果不仁

住金塔寺十四首

丁酉十月作

前年駐蹕峯去年文殊寺到處名且過由來無定止渴  
不過一瓢饑不過簞食爲生已有餘樂哉顏氏子

居山不在高但自遠城市城市非江河日日波濤起

亦是前朝寺寺毀空浮圖嵯峩插霄漢寂寞守山隅老  
僧見再拜持斧斫枯株曲直任天然自手構茆廬四壁  
堅且厚一徑不崎嶇築竈近古井支床疊破書掃葉燒  
不盡拾粟食有餘明月造其堂猛虎伏其閭山前清淺  
流可以濯我軀

二月三月間帶雪長山蔬山蔬有後先衆類同一區青  
紫各異色甘苦味亦殊知名僅八九不復辨其餘山中  
無毒性但食心無虞

四月五月間畦蔬摘有餘口腹亦何厭貪得無賢愚言



采岸邊菌兼采水中蒲菌味既已別蒲根更復殊嶺南  
金竹筍恍惚可與俱十年憶鄉土口嚼心躊躇

六月到七月田中瓜已熟或如團白雪或如削青玉白  
者既純酣青者更芳馥盈筐復盈盤行路亦飽足中原  
莫與京茲惟塞外獨摘小莫摘大大者棄道曲爾徒侈  
外觀人早鑿其腹

八月摘山梨九月摘山菊菊芳可代飧梨酸可克腹軟  
棗紫葡萄牽蔓亦簇簇莫取獻王公聊可綴幽谷

十月草木盡孤松風蕭蕭托根大壑中爭期干雲霄羅  
嶽鮮舊幹鍾山恣狂燒胡爲深雪間蒼然自高標本非

舟楫具無煩雨露澆造物信偶遺誰能矜後凋放情規  
矩外寢卧任逍遙非圖保天年不材甘寂寥寧特顧者  
希詬厲乃獨饒貞介乃其性敢曰凌寒飈珍重匠石流  
毋使斧斤勞

掘地得增鈴搖之音寂然細想隆平日衆鈴競高懸但  
借微風力聲響遠近傳鈴去聲亦盡銷沉在何年此雖  
蒙塵土乃復睹青天靜默信可久舌存安能全

山下多荒土開墾已三年種麥多不收種稻乃得全種  
豆復種粟種麻兼種棉以此爲生活終歲饑頭邊耕田  
博飯食茲語古所傳

一僧腰背曲見予多笑顏少小絕世味中歲歷苦艱一  
從戈甲興展轉島嶼間來此十載餘不復問人寰日日  
荷鋤出日日負薪還自言用力慣一生不敢閒令我聞  
斯言惕然愧素餐

一僧尚年少胡爲耽幽寂結屋在高層蕭然徒四壁寒  
至尚開窓狂飈吹几席仰眺遠山明俯視近溪直時來  
共話言庶可慰朝夕

人盡稱金檜檜亦有虛名以此得實禍殘毀無完形吁  
嗟復吁嗟三匝涕淚零

安居金檜寺高吟金檜篇主人情繾綣老病意留連今

冬又且過不敢擬來年

老僧

八十已有餘九十頗不足日生隆慶間少小薄魚食其  
時邊境寧其時邊穀熟饑饉未曾知况復知殺戮何期  
過盛年遷徙無停軸奔投海島中舉眼少親屬雍髮倚  
空王依然被桎梏上荷皇天慈縱之返山谷言從故里  
過殘敗幾間屋不聞舊人聲但聞山鬼哭雖復身首遺  
淒淒恨孤獨屈指廿載餘不識何世俗我聞未及終貯  
淚已滿腹止止莫復言歲序有往復今時正太平努力  
事饘粥

讀未央上黃巖詩有感用原韻三首

聯袂登飛雲婆娑雲頂樹夜半雨淋漓倏忽千愁聚激  
發多微言感君藥石句黃巖有金僊相期此生遇

我往佳廬日君乘江上濤金輪霧欲散巫山雲尚憐行  
藏從此異貢水忽相遭學道如積薪內顧發呼號

良切斯民憂豈曰邀世福調達佛之仇車匿佛之僕見  
身各自殊寧必戀空谷令我憶斯人深山長痛哭

不寐作

城中有更鼓一更如夜長山中無更鼓長夜益淒涼初  
更剔燈坐燈花燦光芒但願得好睡不復望嘉祥伏枕

當二更須臾到舊鄉夢怯王令嚴回首何匆忙開眼見  
窓白疑是日之光披衣步前簷星斗亂交橫約畧三更  
候掩扉強依床敝絮輕如紙病骨冷如霜展轉多呻吟  
百計覓睡方四更至五更揣摩竟難詳只聞山鬼嘯不  
聞鷄口張盼盼復盼盼天運豈無常同臥皆熟寐唯子  
起徬徨將恐長如此萬古黑茫茫

所聞

所聞未必虛我心不可存所聞未必實我心安可存天  
道無一至人事有同還我自處其平得失無悲歡

病腹

昔有學道人語我護生理未饑必先食未飽必先止自  
從乞食來往往往飽欲死非惟口腹貪得飽良不易所以  
兩歲前腹病繇此起因循直至今禍延猶未已乃悟人  
世間滿足神所忌一切毋令盡災患胡由致

黃熟香

黃熟可憐香厥產在吾里土人呼馬牙血結色微紫其  
次卽烏雲其次卽馬尾采擇名女兒纖纖勒玉指乾白  
淨削除細碎盈筐筐江南競崇之曰此勝沉水沉水比  
佳人此比隱君子芳烈雖不如甜靜斯爲貴豪達徇其  
名賈人徇其利遂使黃熟香氤氳滿天地我來大漠中

永謝芝蘭氣何人遺此香再拜淚及趾感別已經時天  
外逢知已非惟臭味投恭敬桑與梓

示定原

卓哉子之師見予心因二一笑割平生蕭然釋重累命  
汝從予遊衣履常不置願汝作喬松願汝齊無畏汝歸  
必曠喝恐汝學業墜師死殊錚錚汝生寧憤憤我能亮  
汝心見我多含泪汝行不自繇汝志不自遂所以咫尺  
隔經月復經歲我實愧汝師汝顏不須愧飲啄匪自今  
茲事况其最勿笑修福人修福良足貴

示諸子



我頭久已白我齒久已墜我耳近復聾我目近復瞶我  
腹不耐餐况復寒傷肺餘生過十年安得長汝俟今日  
復來日今歲復來歲少壯亦已亾老病誰復在好日信  
無多良遇安能再古聖喻爲山進止存一簣勿以將成  
墮勿以初心委勿以愚自甘勿以智自廢人世何足云  
死生事迺大若不早自決後來誰汝代我生亦平平我  
死汝必悔汝命金石堅汝緣胡可恃努力復努力勿更  
須臾待闔眼卽他生他生未必會

令言龍翠二子禮辭有感

雲生必在山風吹雲不住鳥栖必在林枝搖鳥亦去人

生雲與鳥安得長相聚汝去我尚留我愧不如汝去留  
匪自繇感此泪如注

寒夢

北風吹不歇夢中道路寒故里逢父老凜冽多慘顏五  
嶺炎蒸地臘月常衣單不信別來久霜雪亦漫漫

偶成二首

鳥啼不爲人聲聲催速老雪飛不爲人點點傷懷抱總  
予自心傷遇物無一好

有山豈無石人自厭嵯峨有水能不流人自厭風波所  
見亦由人山水本無他

夜坐

久病長宜靜山中靜有餘况當深夜後積雪在庭除風  
枝寂不鳴四壁虫晏如星斗宿簷際微月淡空虛其時  
心腑澄泰然廓吾廬雲影暫舒卷蕩滌返太初天地化  
爲水何處覓吾軀

木公以閔茶寄山中感賦

真味在淡薄高韻足幽情一啜洗心胃再啜澄神明持  
甌倚喬松忽然生遠情江南素士宅一別十三齡胡爲  
此山中對雪漫孤評殊品需妙製以姓爲其名

山行

山行無遠近信步入幽杳老熊拘枯枝向人立且跳因  
思人世間此物應不少

山中

山中積陰霧人物遜渾蒙日光漸赫然豁見天地通丘  
陵突兀出了別杉與松因思太古民胡能久混同

山境

山境只如此一一皆可悅有石無不松有松無不雪日  
夕衆烟空微鐘上初月禽各靜其枝虎亦安其穴千峯  
一皓然竟與人寰絕仁義屬榮華道法徒餽歎我舌久  
已焦我心久已決安得一二人把臂不須說

野叟

野叟從何來被褐持短筇入門但索飯竟坐無禮容見  
予手執管敢問是何虫三王與五帝全不著其曾一字  
未曾識安知拙與工予因悔讀書山居亦匆匆

偶述

人世難區區聖謨安可恃收拾萬古心深入塵坭裏戲  
謔豈予善宛轉亦非意和光豺虎間緘泪盈腹筇屈舒  
無一可呼吸逼神忌所以恣餘習狂吟不能已

客至

裘輕馬復肥白日自光顯兒童口嘖嘖道傍誰不羨豈

意到山來山老如未見不是輕富貴從未厭貧賤始悟  
人汝驕多因汝眼淺

借書四首

雲霧難遮眼言借古人書信手展殘帙心顏忽已愉人  
各適其適積習寧頓除平生無所爭所爭蠹之餘

上下幾千載治亂非一途或時草木欣日月光庭除或  
時鬼神哭陰霧慄不舒古笑我亦笑古吁我亦吁哀樂  
豈有常掩卷乃寂如始知得與失古今只須與我心本  
洞然天地還清虛

今者古之影古者今之模今人卽古人何必高黃虞手

招諸聖詰羅列坐儼如片語苟有會恍惚動眉鬚苦昔  
抱心死積久不得舒乃知冥漠際欣然一覩余

世人愛讀書將以榮其軀山人愛讀書亦以樂其軀倦  
臥置枕邊行止常與俱人言何苦爾我亦笑其愚不願  
天中天胡爲效世儒

荅戴公

魔佛界非二罪福性原空章江與遼海色味等皆同麋  
鹿亦可遊何必盡王公冰雪亦可餐胡爲羨馬融昔昔  
龐居士家財沉水中豈無男與女相與樂融融世世無  
生話浮雲任西東